

Հ Ա Յ Տ Ա Ր Ա Ր ՈՒ Թ Յ ՈՒ Ն

Հայաստանի Հանրապետության կրթության և գիտության նախարարությունը 2009 թվականի հուլիսի 10-17-ը Երևանում միաժամանակ կազմակերպում է դպրոցականների երկու համահայկական միջոցառում՝ Հայոց լեզվի և հայ գրականության 4-րդ օլիմպիադան և Հայագիտական գիտելիքների մրցույթ:

Ձեռնարկների նպատակն է՝ խթանել և խրախուսել հայոց լեզվի, հայ գրականության, հայոց պատմության և հայ մշակույթի իմացությունը, առողջ մրցակցության պայմաններում դրսևորել իրենց գիտելիքներն ու ստեղծագործական կարողությունները, նպաստել առավել շնորհալի պատանիների հայտնաբերմանը, ինչպես նաև՝ ծանոթանալ տարբեր երկրներում բնակվող հասակակիցների հետ:

Օլիմպիադային և Հայագիտական գիտելիքների մրցույթին կարող են մասնակցել 14 տարին լրացած և բարձր տարիքի անհրաժեշտ իմացություն ունեցող դպրոցականներ:

Մասնակիցներ կարող են լինել հայերեն ուսուցմամբ վարժարանների և կրթօջախների /այդ թվում՝ միօրյա/ սաները, ինչպես նաև՝ այլ դպրոցներ հաճախող հայ և օտարազգի պատանիներ:

Հայոց լեզվի և հայ գրականության օլիմպիադայի աշխատանքային լեզուն հայերենն է: Օլիմպիադայի արդյունքները ամփոփվելու են երկու՝ հայոց լեզվի գրավոր և հայ գրականության բանավոր մրցույթների արդյունքներով /տես. «Հայոց լեզվի և գրականության օլիմպիադայի ուղեցույց»/:

Հայագիտական գիտելիքների մրցույթն ընդգրկում է հարցեր հայոց պատմությունից և հայ մշակույթից: Մրցույթին կարող են մասնակցել նաև ոչ հայախոս պատանիներ՝ իրենց նախընտրած լեզուներով /տես. «Հայագիտական գիտելիքների մրցույթի հարցաշար»/:

Ցանկության և համապատասխան հայտ ներկայացնելու դեպքում հնարավորություն է ընձեռվում մասնակցել և՛ Օլիմպիադային, և՛ Հայագիտական գիտելիքների մրցույթին:

Հայոց լեզվի և գրականության օլիմպիադայի կողմնորոշիչ թեմաների ցանկին և Հայագիտական գիտելիքների մրցույթի ամբողջական հարցաշարին կարելի է ծանոթանալ նաև Հայաստանի Հանրապետության կրթության և գիտության նախարարության պաշտոնական և Կրթական տեխնոլոգիաների կենտրոնի ինտերնետային կայքէջերում:

Հայոց լեզվի և գրականության օլիմպիադայի և Հայագիտական գիտելիքների մրցույթի հաղթողների համար սահմանվել են 1-ին, 2-րդ և 3-րդ կարգի մրցանակներ: Մրցությունն ու մրցանակաբաշխությունը կազմակերպվում են ըստ տարիքային խմբերի:

Հայոց լեզվի և գրականության օլիմպիադայի և Հայագիտական գիտելիքների մրցույթի մասնակիցների համար լրացուցիչ նախատեսվում են ասմունքի, ճարտասանության, հայրենասիրական երգի և այլ ստեղծագործական մրցույթներ, վիկտորինաներ, որոնց կարելի է մասնակցել ըստ ցանկության: Այս մրցույթներում հաղթողների համար սահմանվել են հատուկ և խրախուսական մրցանակներ:

Պատվիրակների համար նախատեսված են նաև տարաբնույթ մշակութային, ուսուցողական և զվարճային միջոցառումներ:

Հնարավորության դեպքում, ցանկալի է Օլիմպիադայի և Մրցույթի մասնակիցների միացյալ պատվիրակություն /խումբ/ ձևավորել ըստ երկրի կամ բնակավայրի՝ առավել բանիմաց թեկնածուների ընտրության և ներկայացուցիչներ ուղարկելու խնդիրը համակարգելու համար: Մասնակիցների կազմում կարելի է ընդգրկել նաև համապատասխան օտարազգի պատանիներ: Պատվիրակությունը /խումբը/ պետք է ունենա ղեկավար և մասնակիցների թվակազմի համեմատ ուղեկից/ներ/՝ մինչև 10 պատանու համար 1 ուղեկցող համամասնությամբ: Պատվիրակության

/խմբի/ ղեկավարն իր նախընտրությամբ Երևանում կարող է համալրել համապատասխան մրցութային հանձնաժողովի կազմը:

Ձեռնարկներին համահայկական բնույթ հաղորդելու համար հայցում և ակնկալում ենք հայկական համայնքների, ազգային-հասարակական հաստատությունների և կազմակերպությունների, Թեմական և կրթական խորհուրդների հատուկ ուշադրությունն ու աջակցությունը: Ուրախ կլինենք բոլոր հայկական կրթօջախներից պատվիրակներ ընդունելու համար:

Օլիմպիադայի և Հայագիտական մրցույթի ընթացքում մասնակիցների, ղեկավարների և ուղեկցողների կեցության, սննդի և շրջագայության ծախսերը ստանձնում է Հայաստանի Հանրապետությունը: Ճանապարհածախսը հոգում են մասնակիցները կամ համապատասխան կազմակերպությունները, կրթօջախները, բարերարները:

Մասնակցության հայտերը պետք է լրացնեն պատվիրակությունների /խմբերի/ ղեկավարները և ՀՀ կրթության և գիտության նախարարություն փոխանցեն մինչև 2009թվ-ի հունիսի 10-ը: Մինչև հուլիսի 1-ը հարկ է ներկայացնել նաև Երևան ժամանելու և Երևանից մեկնելու ժամանակետը և այլ մանրամասնություններ՝ գործընթացը պատշաճ կերպով կազմակերպելու համար:

Հայոց լեզվի և հայ գրականության օլիմպիադայի և Հայագիտական գիտելիքների մրցույթի մասնակիցները Երևանում պետք է լինեն հուլիսի 10-ից ոչ ուշ:

Հավելյալ հարցերով կարելի է դիմել Հայաստանի Հանրապետության կրթության և գիտության նախարարություն.

հեռ. +374 10 58-13-91

ֆաքս. +374 10 52-73-43

Էլ.փոստ: spyurq@yahoo.com, info@edu.am

Կայքաէջ: www.edu.am, www.armedu.am